

## Confronto tecnologico de due generasioni «lontane»

Sabato, 18 april 2015

Ciao diario,

Ogi iero come ogni sabato de nona e nono a pranso. Sto poco de tempo che stago la de lori xe però perverso una otima ocasion per scambiar opinioni, idee, barzelete e anedoti. No se sa se più me meraviglio mi dele sue storie lontane nel tempo e dei pensieri molto diversi dai mii, o lori perché serte storie che i me conta per esempio xe adiritura de oltra 70 ani fa, ma lori i se le ricorda come se fussi sucesse ieri. O i xe più stupidi lori co ghe conto come mi passo el tempo, cosa fasso, dove vado, de cosa parlemo noi giovani del terzo milenio e simili... Per non nominar che miracoli quando tiro fora dela scarsela el telefono per leger el mesagio che go ciapà! I mii noni co i vedi sto agegio, ghe par che gabio in man qualche ordegno col qual quei dela NASA i ghe dà la caccia ai estraterestri! Sul serio! No i pol smeter de meravigliarse e ripeter esclamasioni del tipo: «Madona!», «Mama mia!» e «Dio mio!» e spalancar i oci come se i poderia magnarlo con lori e se, per caso, lo lasso sul tavolo, visin de la television o de qualche altra parte incustodido, allora i sta atenti de tegnir una distansa de almeno un metro e meso de lui, senza esagerasion, perché i ga paura che i podessi rovinarlo solo tocandolo o guardandolo. Mi tuta sta situasion me xe molto bufa, ma a lori no. Lori i «porta rispetto» più de mi stesa de sto marchingegno, che no i se ricordera' mai de ciamar cellulare, ma i continuerà sempre a ciamarlo «Internet», nonostante tute le coesioni de mia mama e de mi. Ma no solo, mi me xe molto ridicolo anche el loro comportamento nei confronti de tute le robete che me porto con se la de lori. I ga paura de no rovinarle solo guardandole. E dopo naturalmente me ricordo che ste robe che fa parte dela mia vita quotidiana no esisteva né nela sua infanzia né giovinessa. Lori no i gaveva come mi un telefono col qual se pol telefonar, mandar mesagi, fotografar, filmar, scoltar musica, guardar foto o giogar gioghi (e queste per mi xe solo le opzioni più basilari). Lori per telefonar un tempo i doveva andar o de qualche vicin de casa che gaveva el telefono o dirghe de persona al destinatario quel che se gaveva de dir. E i mesagi i li mandava soto forma de letera e no i rivava come a mi dopo pochi secondi, ma serviva qualche giorno, e se iera de una città de l'altra parte del stato opur de un altro stato, allora l'atesa durava anche qualche settimana rispettivamente mese, tegnindo conto che lori iera giovani nel periodo dela guera e del dopoguera. E si, gaver una machina fotografica in bianco e nero e con la pellicola quela volta iera una rarità, e noi giovani se lamentemo se sui telefoni no gavemo la fotocamera de davanti e de drio con ingrandimento, blitz, efeti speciai e, minimo, cinque megapixel per poderse fotografar. Fassemo infinite foto de se stesi e stupidese intorno a noi al giorno, e lori i se fotografava una volta al ano o in qualche gita o per qualche avvenimeto speciale considerando solo el fotografarse un vero e proprio avvenimeto. E dopo ste foto se andava sviluppar e se le meteva in album per conservarle, guardarle fra qualche ano, ricordarse dei bei momenti e mostrarle a parenti quando i vegniva in visita, scrivendo sempre data e logo de drio de ogni foto per, fra un poco più de tempo, no dimenticarse o confonderse. Per non parlar de la musica! Mi me lamento se posso scoltarla solo con una cufieta, co l'altra se guasta. E lori? Cosa i diseva lori se in qualche modo acidentalmente ghe se rompeva el disco e no i poteva più scoltarlo sul gramofono? No i poteva come mi con le cufiete solo corer in botega, sborsar qualche soldin e tornar a casa con une nove. E no. No iera tante boteghe de dischi in giro, e po, anche se se trovava qualcheduna, no iera sempre sicuro che se poteva trovar proprio quel disco che se voleva e serviva, perché magari quel che se ga roto no iera suo, ma de qualche amico che ghe lo gaveva imprestà. Quela volta si che iera problemi! E no i iera miga a bon mercà i dischi! I iera bastansa cari. Se una persona gaveva tanti dischi, poteva considerar de gaver una bela e preziosa coesion, che ogi val un ocio dela testa. Noi giovani invese femo i furbi e tuto un «disco» se lo tiremo xò de Internet in modo legale o meno e lo trasferimo sul cellulare,

spendendo niente che qualche megabite dela enorme memoria del telefonin. E dopo stemo ore e ore intacadi a 'sti celulari perdendo occasioni de socialisar, far nove conosense e amicisie e divertirse come Dio comanda. No semo contenti, no volemo cambiar, ma se lamentemo lo steso. E i nostri noni i iera molto più furbi de noi: co i iera giovani i andava de sera a balar nele varie comunità, balere e robe simili dove se organisava bali e intratenimenti per la gente. La i conoseva tanta gente. I fasceva molte nove amicisie dale quali poi saltava fora i vari anedoti che ogi i pol contar e che noi giovani poderemo solo gelosamente ricordar e tramandar avanti senza eser in grado de contarghene de nostri se continuemo a dipender dala tecnologia senza mai guardarse intorno.

Fa ben i mii noni a dirme e ripeterme che la tecnologia xe una roba bela, bona e utile de la quala lori no i se intendi, ma bisogna anche con ela gaver un limite e capir quando bisogna meterla de parte e parlar con la gente guardandola ne i oci. Per 'sta roba, a diferenza de cento altre, ghe dago assolutamente ragion...!